

Summæ Potestates habeant jus condendi Leges, eo ipso quo jus habent regendi subditos, quod citra legis subsidium difficulter vel planè fieri nequit, ideoque subditis obsequium præstare incumbit, secundum dictamen Conscientiæ, & num non ille, qui leges, à legitima potestate latis, spernit, culpam contrahit, DEI Ministrum contemnit & Conscientiam suam contaminat? Accedit *Consensus Theologorum*, quibus faciem præfert *Augustinus* lib. 19. de *Civitate DEI* cap. 17.

## LXI.

Excedunt hinc Pontificii primò, qui cum *Bellarmino* statuunt, *Legem civilem non minus obligare in Conscientia, quàm Lex divina, etsi minùs firma & stabilis sit hac Lex, quàm illa.* addito, quòd *Lex divina & humana differant quoad firmitatem, quia divina non possit abrogari ab homine, humana possit; at qua obligationem non differre, utramque enim obligare in Conscientia nunc ad mortale, nunc ad veniale peccatum pro rerum ipsarum gravitate, ita ut nulla sit melior Regula ad discernendum, utrum Lex humana obliget ad mortale, an ad veniale, quam cogitare, legem illam esse divinam, & videre, si divina esset, quomodo obligaret.* Accensentur autem *Bellarmino* in hac sententia ab ipsis Pontificiis, *Turrianus, Covarruvias, Navarrus, Felinus, Anbaranus, & Johannes Calderinus, & alii.* Secundò deficient *Anabaptista & Libertini*, quos describit *Stanislaus Rescius* sequentibus verbis: *Fanaticum hominum genus, in quo jure credas revixisse Gnosticos & Valentinitas: quibus nil equè displicet ac simplex, proprius, & germanus Scripturae sensus. Illis Christus est satana, vitium virtus, & virtus vitium. Nihil enim ex eorum sententiâ peccatum est, nisi eorum opinione qui se peccare putant. Verus Dei timor, & eo imbuta conscientia, pro inferno illis habetur; pro paradiso autem conscientia divini iudicii contemptrix, securâ, stupida & consopita. Docent, omnia homini esse licita, sine ullâ exceptione, omneque vivendi genus probant: lenonem suo volunt fungi munere, fures audacter furari iubent; matrimonia dissolvi volunt, cum uxor mariti sui tadium ceperit: unde promiscuos laudant concubitus, idque vocant spiritale matrimonium. Communionem Sanctorum vocant communionem bonorum temporalium, ideoque quantum quisque potest rapiat, suadent. Resurrectionem iam factam esse dicunt, neque aliud expectandum iudicium. Jam Christianos omnes resurrexisse affirmant, quando animam humanam sciunt iam factam esse illum DEI spiritum*  
*immor-*